


TEZAUUR LITURGIC

31 IULIE

**ACATISTUL
SF. IERARH-
MĂRTURISITOR
VASILE
PREOBRAJENSKI,
EPISCOPUL
KINEȘEMSKULUI**



MOSCOVA, 2000



Акафист святителю Василию Кинешемскому

Кондак 1

Возбранный архипастырю и исповедниче
Христов, в годину безбожия в Российстей земле
пострадавый, и велие дерзновение пред
Господом стяжавый, моли о людех,
недостойными устнами воспевающих ти
похвальная, да избавимся от злыя напасти и
обстояний, зовущи:

Радуйся, святителю Василие, веры
православныя крепкий исповедниче.

Икос 1

Ангелом светоносным подражателю и
земнородных наставниче был еси, святителю
отче Василие; поистине царским путем к
небожителем возшел еси, отонудуже призирая
выну на ны грешныя, услыши во умилении
вопиющих ти сице:

Радуйся, на служение апостольское от страны
Российския призванный,
Радуйся, избрание твое исповеданием веры
православныя оправдавый,
Радуйся, житие праведное от юности

возлюбивый,
Радуйся, добродетели родителей благочестивых
унаследивый,
Радуйся, послушание дивное родителем
богомудрым явивый,
Радуйся, измлада воздержанию, молитве и посту
прилежавый,
Радуйся, вся соблазны мира сего презревший,
Радуйся, Христу Единому работати вожделевый,
Радуйся, святителю Василие, веры
православныя крепкий исповедниче.

Кондак 2

Видя Промыслитель о всех Господь доброту
души твоея, возжела поставить тя архипастыря
словесных овец Своих; чудесным убо образом от
потопления в реце Волзе ты, святителю,
избавляя, да во умилении сердца вопиеши Богу:
Аллилуиа.

Икос 2

Разумом Богопросвещенным уразумел еси, святе
Василие, нищету стяжаний земных и тленных, в
небесная и вечная ум вперив, возжелал еси
приятти образ ангельский, святителя Великаго
Василия небесным покровителем имея; прими
же и от нас недостойныя похвалы сия:
Радуйся, целомудрия дивное украшение,

Радуйся, чистоты душевныя и телесныя
усердный хранителю,
Радуйся, всецело духу твоему плоть
поработивый,
Радуйся, нестяжанием твоим вся удививый,
Радуйся, яко прилежал еси молитвам усердным
и коленопреклоненным,
Радуйся, каждодневным служением Богу
угодивый,
Радуйся, горе устремивый вся помыслы души
твоя,
Радуйся, суетство привременное презревый,
Радуйся, святителю Василие, веры
православныя крепкий исповедниче.

Кондак 3

Силою Божественною преизрядно укрепляем,
свiate Василие, каждодневныя Богу служения
исправляя еси, проповедуя Слово Божие пастве
твоей, обходя грады и веси, посещая всех,
чающих утешения твоего и научая богоприятно
пети всех Творцу: Аллилуия.

Икос 3

Имея ревность о спасении паствы твоя, от
зверя душетленного стадо твое соблюдая,
скверная учения беззаконных обличал еси, и яко
огнь опаляющ для безбожных и злых был еси.

Мы же почитающе твое непоколебимое
мужество, с любовью взываем сице:
Радуйся, громе, сокрушай еретическое
злочестие,
Радуйся, кающихся грешников надеждо и
увеселение,
Радуйся, заблуждающих исправителю
прекроткий,
Радуйся, беззаконных обличителю незлобивый,
Радуйся, лжи и всякаго нечестия истребителю,
Радуйся, стада Христова от волков хищных
оградителю,
Радуйся, Слова Божия неутомимый
проповедниче,
Радуйся, Благодати Божией вместилище,
Радуйся, святителю Василие, веры
православныя крепкий исповедниче.

Кондак 4

Бури еретического злословия не убоялся еси,
святителю отче Василие, егда мерзкое
обновленчество раскину сети своя, уловляя
слабодушныя и маловерныя люди в погибель.
Егда же изгнаша тя из храма властью
беззаконною и богомерзкою, совершал еси
служение посреди града, обильно орошая
ланиты своя, слезя и вопия Богу: Аллилуия.

Икос 4

Слышавше слова спасения от медоточивых
устен твоих изливаемая, множество
православных людей на Богослужения твоя
стекашеся. Словом истины утешаеми,
прославляше Господа за такового предивного
архипастыря, в годину лютую им дарованного;
приими и от нас величание сие:
Радуйся, яко вещание твое во вся концы земли
нашея изыде,
Радуйся, яко слава твоя в роды родов достиже;
Радуйся, малым сиротам питателю и
помощниче,
Радуйся, неимущих богатое сокровище,
Радуйся, струями благодати сердца нищих
напоивый,
Радуйся, пищею словес Божиих верныя
изобильно насытивый,
Радуйся, молитвенниче наш ко Господу
непрестанный,
Радуйся, теплый о нас грешных пред Богом
предстателю,
Радуйся, святителю Василие, веры
православныя крепкий исповедниче.

Кондак 5

Боготечный источниче милости Божия был еси
на земли, святе Василие, приял бо еси власть

недузи душевныя и телесныя исцеляти, правую веру укрепляти, благодатными и премудрыми словеса твоими научая стадо свое воспевати Богу: Аллилуия.

Икос 5

Видевше жители града Кинешмы и окрест лежащая веси ты, достохвальне отче, архипастыря предивна, житие нескверно имуща; богомудрым бо словесем твоим умильно внимающе, прославляху Единого Бога в Троице славимаго. Темже и мы приносим ти сицевая: Радуйся, скорби жития сего претерпевый и данныя ти таланты приумноживый, Радуйся, поношения за возлюбленного Господа приявый, Радуйся, плевелы суетумудрия мечем Слова Божия посецаяй, Радуйся, благонравное житие в тайных подвизех исправляяй, Радуйся, яко многочадную мать со одра смертнаго молитвою твоею воздвигл еси, Радуйся, слез скорбных отроковицы о умирающем отце не презрел еси, Радуйся, яко твоим предстательством здравие оному даровал еси, Радуйся, яко безчадным родителем чадо молитвенно у Бога испросил еси,

Радуйся, святителю Василие, веры православныя крепкий исповедниче.

Кондак 6

Проповедник веры Христовы твердейший адаманта был еси, отче Василие, яко добрый воин Христов, ограждая паству твою в годину смертных искушений. Злобныя же богоборцы замыслиша погубити тя; ты же яко агнец кроток на страдание за Христа изшел еси, воспевая Промыслителю о всех Богу: Аллилуиа.

Икос 6

Возсиял еси в Церкви Христове, яко некое лучезарное светило, архиерею Божий, егда безбожныя власти изгнаша тя в край Зырянский; яко во исповедании твоём не утрашился еси человеческих прещений, тако и мы недостойнии со трепетом взываем сице:
Радуйся, Агнец кроток, Агнцу Христу закланному уподобивыйся,
Радуйся, волею своею страдания за Христа приемый,
Радуйся, Господеви, а не человеком угождавый,
Радуйся, Имене Его ради гонения от отступников приявый,
Радуйся, Златоустову терпению в ссылках и темницах подражавый,

Радуйся, исповедниче, за грехи отечества твоего
пострадавый,
Радуйся, яко даже до смерти верен истине
пребыл еси,
Радуйся, яко силою Божией в подвизех
непобедим явился еси.
Радуйся, святителю Василие, веры
православныя крепкий исповедниче.

Кондак 7

Хотяй испытати веру народа Российскаго,
попусти Господь гонения и скорби на люди
Своя, да претерпевшии до конца спасени будут.
Ты же, святе Василие, вкупе с мученики и
исповедники Российскими прославил еси
истиннаго Бога, взывая Ему: Аллилуия.

Икос 7

Новый светильник возсиял еси в Церкви
Христове, отче Василие, благодатию бо Божиею
укрепляем, велия скорби и болезни претерпел
еси и многолетныя лагерныя труды понесл еси за
благовестие Христово; избиения, истязания,
мучения лютая в темницах приял еси от слуг
сатанинских. Таковому убо долготерпению
твоему дивящися, восхваляем тя сице:
Радуйся, за грешныя люди Российския земли
пред Богом теплый ходатаю,

Радуйся, стране сей и всему отечеству нашему
многоценное украшение,
Радуйся, сердца наша в единомыслии и любви
ко отечеству нашему направляяй,
Радуйся, от потопления бурями житейскими
российския люди спасаяй,
Радуйся, яко тобою паства Кинешемская
просветися,
Радуйся, яко вера Христова в ней утвердися,
Радуйся, града Кинешмы славо и утешение,
Радуйся, Новомучеников Российских удобрение,
Радуйся, святителю Василие, веры
православныя крепкий исповедниче.

Кондак 8

Странника и пришельца на земли сей себе
помышляя, ревностно пасл еси стадо словесных
овец Христовых, досточудне отче Василие, да
обрящеши вся пасомыя на нетленных пажитех
небесных, вкупе с ними вопия Богу: Аллилуиа.

Икос 8

Весь исполнен любве нелицемерныя к пастве
твоей, отче честный Василие, спасение убо
всяцей душе христианстей устрояя, не иский
своих си, но пользы многих, да некия спасеши.
Сего ради, почитающе святую память твою,
усердно взываем ти таковая:

Радуйся, ко спасению добрый путеводителю и наставниче,
Радуйся, архиереев доброто, священников и иноков похвало,
Радуйся, монашествующих неложный учителю,
Радуйся, ко спасению верный путеводителю,
Радуйся, от ересей и расколов крепкое ограждение,
Радуйся, пастырем и пасомым доброе поучение,
Радуйся, путеводная звездо блуждающим во мраке безбожия,
Радуйся, облаче, источающий росу учений благочестивых,
Радуйся, святителю Василие, веры православныя крепкий исповедниче.

Кондак 9

Всем человеком хотящему спастися Христу, во изгнаниих непрестанно молился о чадах твоих, отче, да не имут в сердцах своих злобы, да благотворят ненавидящим, да благословляют проклинаящих, яко вся полезная ко спасению посылает Господь людем Своим. Мы же имея тя молитвенника теплаго ко Господу, со дерзновением поем Ему: Аллилуиа.

Икос 9

Витии мира сего риторскими своими языки не
возмогут изреци тебе достойныя хвалы,
пастырю дивный, многих ради твоих подвигов и
болезней, яже за Христа и Церковь подъял еси
волею. Сего ради и мы недоумея восхваляти тя
по достоянию, воспеваем сице:

Радуйся, яко страданьми твоими вера правая
утверждается,

Радуйся, яко по словеси твоему Церковь
Христова в Российстей земле возрождается,

Радуйся, паству твою до кончины своея
попеченьми не оставивый,

Радуйся, и по кончине присный о нас ходатаю,

Радуйся, яко молитве смиренной и покаянной
научаеши,

Радуйся, яко любви ко Христу Богу в чадах своих
возгреваеши.

Радуйся, мужества и терпения плоды Господеви
твоему принесый,

Радуйся, в правде Христовой во дни испытаний
крепце устоявый.

Радуйся, святителю Василие, веры
православныя крепкий исповедниче.

Кондак 10

Спасителя мира Христа Бога умоляти за ны не
престай, святителю Василие, тебе бо дадеса

благодать и милость молитися за чтущия память твою. Да с верою притекающие ти, благодати Божией сподобимся, с любовью воспевая Ему: Аллилуиа.

Икос 10

Стену ты непоколебиму обретше, светло
празднуем святую память твою, преславне отче
наш Василие; ты еси покрове и непостыдная
надеждо припадающим и молящимся тебе сице:
Радуйся, ведение Божественных Тайн предивно
стяжавый,
Радуйся, терпением скорбей и болезней древним
отцам Церкви подражавый,
Радуйся, яко сподобился еси зрети небесныя
силы, Престолу Божию предстоящи,
Радуйся, дар провидения от Господа приемый,
Радуйся, непрестанною молитвою на высоту
безстрастия возшедый,
Радуйся, доброе семя в сердце своем
возрастивый,
Радуйся, Богоначертанный свиток правыя веры,
Радуйся, добрый учениче небеснаго Учителя
Христа,
Радуйся, святителю Василие, веры
православныя крепкий исповедниче.

Кондак 11

Пение немолчное и моление теплое прими от нас немощных, святителю Божий, не престай милостивно взирати на паству твою земную, на град сей и обитель сию; зриши бо наши скорби и нужды, болезнуеши о наших немощех и гресех, подвижая и нас недостойных во умилении глубокоем пети Господеви: Аллилуиа.

Икос 11

Светоносный светильник был еси, отче Василие, в годину лютыя скорби возженный в стране нашей; не остави ны, соотечественницы твоя, ныне по морю страстного жития блуждающия, простри руку помощи, вопиющим ти сице:
Радуйся, добрый и неусыпный делателю нивы Христовой,
Радуйся, Единого истинного Бога проповедниче,
Радуйся, правды ревностный блюстителю,
Радуйся, пастырского служения непоколебимый исполнителю,
Радуйся, церковных канонов премудрый насадителю,
Радуйся, сокровищ Православныя веры усердный хранителю,
Радуйся, яко от святых мощей твоих исцеления подаваеши,
Радуйся, яко и по преставлении твоём с нами

пребываеши,
Радуйся, святителю Василие, веры
православныя крепкий исповедниче.

Кондак 12

Благодати Божия сокровище явися всечестная
рака мощей твоих, святителю отче Василие,
еюже недужнии исцеляются, озлобленнии
умиряются, скорбящии утешаются, омраченнии
просвещаются, и вси прославляют Бога, дивного
во святых Своих, поюще Ему: Аллилуиа.

Икос 12

Поем и восхваляем Многомилостиваго Бога,
даровавшего отечеству нашему крепкаго
предстателя и заступника – святителя нашего
Василия; чтим страдания и болезни твоя,
ублажаем святое житие твое, почитаем честную
кончину твою и прославляем священную память
твою, от избытка сердца вопиюще:
Радуйся, земли Российския пастырю предобрый,
Радуйся, Церкви Российския красото,
Радуйся, душу твою за други своя положивый,
Радуйся, друже Царя Небеснаго, о спасении
многих поревновавый,
Радуйся, яко град верху горы от верных и
неверных не утаивыйся,
Радуйся, благий рабе и верный, вшедый в

радость Господа твоего,
Радуйся, непоколебимо стояти за Православную
веру Христову нас научаеши,
Радуйся, молитвами твоими от ересей и
расколов Церковь нашу ограждаеши,
Радуйся, святителю Василие, веры
православныя крепкий исповедниче.

Кондак 13

О, преславный угодниче Христов, святителю
отче Василие, стране Российстей удобрение,
похвало и радование. Вонми гласу молений
наших, из глубины сердец возносимых; испроси
у Всещедраго Бога грехов оставление нам
даровати и вечнаго мучения избавитися, да во
Царствии Его выну воспеваем: Аллилуиа.
Трижды.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО